

Date – 16/04/2024

Time - 7:30 -7:40Hrs

REGIONAL NEWS BULLETIN

HEADLINES (MORNING)

1. Chief Minister Pu Lalduhoman, tun hnaia MPSC-in MCS exam a kalpui dan leh Forest Officer a lak danah thil fello nia zirlai hruaitu ten a hnena an thlen chu chhui chian a nih tur thu a sawi
2. Tun thla ni 19-a Lok Sabha MP thlanga vote thlak turin inbuatsaihna ngawrh taka kalpui a ni a, political party te pawh campaign hun tawp hma vote zawngin theitawp an chhuah mek a ni.
3. Mizoram DGP Pu Anil Shukla chuan Lok Sabha inthlanpui vote thlak tuang taka neih anih theih nan Mizoram Police-te theitawp chhuahin an inpuahchah a ti.

<><><>

CM

Chief Minister Pu Lalduhoman, tun hnaia MPSC-in MCS exam a kalpui dan leh Forest Officer a lak danah thil fello nia zirlai hruaitu ten a hnena an thlen chu chhui chian a nih tur thu a sawi.

Nizana Khawzawl Zaingen YMA hall-a an party campaign ah he thu hi sawiin zirlai hruaitu ten MPSC hna lak danah thil fel lo a awm a ni tia a hnena an thlen chu thil dik lo a awm ngei leh awm ngei loh a sawi theih loh thu sawiin, hetiang a thil a kal takah chuan chhui chian a ngai tiin chhui-chianna tupek nimin khan tih chhuah a ni a ti a, hemi chungchang chhui tur hian IAS officer pension Pu M Lalmanzuala chu a ruat thu leh ni sarh chhunga report pe tura tih a nih thu a sawi baw a ni.

Chief Minister Pu Lalduhoma chuan, MAMCO hnuaiia sum tih - chingpen chungchanga ZPM MP Candidate Pu Richard Vanlalmangaiha puhna chungchang pawh sawiin, MAMCO a thawh laia an hotupa in mi hrang hrang hnen atanga contract pek tiana pawisa a lak tin chung-changah hriatpuitu atana a tan thin thu leh a hming pawh a sign ngei thu a sawi a, he thubuai chhuichian a nih hnuah MAMCO a an hotupa chu thiam loh chan tir a ni a, thiltisualtu man chhuah kawngah an party candidate chu a tangkai ber atana hman a nih avangin zalen takin thiam a chang a ni a ti baw.

Pu Lalduhawma chuan Lok Sabha Inthlanpui lo awm turah Vaitawng leh sap tawng duh ang taka hmang thiam Lok Sabha MP Candidate Pu Richard Vanlalmangaiha thlan tlin a nih chuan sorkar laipuah state mamawhte an thlen thei dawn a, MP-in hma min lo lakpui thei dawn a ni a ti baw.

<><><>

ZPM CANDIDATE FILED CRIMINAL COMPLAINT

ZPM Lok Sabha MP Candidate Pu Richard Vanlalmangaiha chuan sum tih chingpen chungchanga amah puh hmingchhetute chhui turin Aizawl District Chief Judicial Magistrate hnenah Criminal Complaint-a thehlut a, hei hi thudik hai lanna tur a ni a ti.

Nimin khan Aizawl District Court tuala Chanchinbu mite hmaah thusawiin ZPM MP Candidate chuan MAMCO hnuaiia Kendriya Vidyalaya sakna tur sum tihchingpen chungchang CBI in a chhui tawha telvea amah an puhna chungchang leh Hnahlan Grape chingtute sum hmuh tur chungchanga amah puhna ah za a za a a fihlim thu a sawi a, puh hmingchhiat a nihna kawngah pawisa a kut a a luh loh thu te leh Mizoram a Grape chingtute tih hmasawna kawngah leh grape sawngbawlina lamah sorkar tha chakna hmanga theihtawp a chhuah thu a sawi a, grape chingtute tih hmasawna atana sum awm za a 35 a ei ni a puhna chungchangah pawh Grape chingtu society ten hemi chungchang hi chiang takin an lo sawi tawh a ni a ti.

Criminal Complaint hi facebook-a thu post tu David Sailo inti, Lalrammuanpui Izu, Youtube-a Tuesday Nightmare hminga channel nei tu leh, Tlanghmingthanga Aizawl Mission Vengthlang a mi te lakah file a ni.

<><><>

CAMPAIGN

Tun thla ni 19-a Lok Sabha MP thlanga vote thlak turin inbuatsaihna ngawrh taka kalpui a ni a, political party te tan pawh campaign hun ni 2 chauh a awm tawh avangin, party tin ten theihtawp an chhuah mek a ni.

<><><>

MNF CAMPAIGN

MNF MP Candidate Pu K Vanlalvena chuan Zofa hmun hrang hranga thendarha awm mekte inpumkhatna turin theih tawp a chhuah zui zel dawn tih sawiin Zofa hmun hrang hranga awmte tana MP nih a tum niin a sawi.

Nimina MNF Party Office Mizo Hnam Runah thusawiin Pu Vanlalvena chuan Lok Sabha MP atan a tling a nih chuan ruling party-ten an thawhpui duh phawt chuan an MP candidate aiin a t̄angkai daih zawk mai thei a ti a, tu tan pawha MP thawhpui theih nih a tum a ti.

Pu K Vanlalvena chuan mipui zawng zawngte vote thlak t̄heuh turin a sawm a. Amah vote lo tur pawhin vote thlak vek tura sawmin democracy ram anih angin vote thlak chu a hlu hle a ni," a ti a. "Huatna, khakna te tel lovin rilru thianghlim takin t̄awngt̄aina nen a campaign zel dawn tih a sawi a ni.

<><><>

CONG PRESS CONF

Mizoram Pradesh Congress Committee President Pu Lal Thanzara chuan kumin Lok Sabha inthlanpui chu sakhaw zalenna duh tute leh sakhaw zalenna nekchepna duh tute inbeihna a ni, a ti.

He thu hi Congess party-in nimina Aizawl Press Club-a Chanchinbu mite an kawmnaah sawiin, Pu Lal Thanzara chuan Mizo mipuite chu kumin Lok

Sabha inthlanpui neih mekah, party zawnga thil thlir lova, Mizote sakhua Kristianna humhimna atan Congress MP Vote theuh tura a ngen thu a sawi.

Congress MP Candidate Pu Lalbiakzama pawhin BJP sorkarna hnuaiah hnam tenau zawkte chu hlamchhiah an nih thu sawiin, thu thar thehdarh kawngah pawh BJP chuan thil an thup nasa hle a ni, a ti a. Khawvela sum leh pai lama hlemhletna lian ber, India rama electoral bond chungchang pawh mipui nawlpui hriat theih loh tura hup beh hmak a ni a ti a, BJP hmalakna a zara Hindu lalram lian mek chuan Mizoram a thlen hunah chuan Mizote chan chu maian chan pawh a tluk lo ang a ti. NDA Sorkar chu mipuite zalenna chanvo nasa taka rapbettu an nih thu leh Sorkar laipui hnuaia CBI, Enforcement Directorate leh Income Tax Department-te chu mipui vantlang leh an lama tang lo Political Party leh hotute harsatna siamsakna hmanrua-ah an hmang nasa hle niin a sawi bawk.

Pu Lalbiakzama chuan kum kalta 2023 chhungin Kristiante tih duh dahna lam hawi, tum 648 zet a tlen thu leh hemi chungchangah hian Prime Minister leh Union Home Minister-te chu an ngawih reng thu a sawi a, BJP ten Lok Sabha inthlanpui a hnehna an chang a nih chuan Uniform Civil Code hman a nih vat tur thu leh India dan pui Constitution chu BJP duh zawnga her danglam a nih tur thu a sawi bawk.

<><><>

BJP CAMPAIGN

BJP Mizoram Election Management Chairman Dr K Beichhua, MLA, chuan Mizoram a MP Candidate paruk zing aṅanga Campaign au hla te leh state dinhmun enin a beidawn thlak hle a ti a.

Nimina Aizawla an an party office ah thusawiin Dr K Beichhua chuan India ram ah MP 543 thlan chhuah tur a ni a, chumi aṅang chuan Mizoramin MP pakhat a nei ve a. Party pakhat chuan Central ah zawlpui neih an tum loh thu an sawi a, MP 543 zinga zawlpui neilo pakhat khan eng nge a zuk tih ang tih ngaihtuah a ngai a ni a ti a.

Pakhat chuan Mizorama NDA nilo, Central ah NDA nih a tum thung a, 'Chinghne Beram vun' sin hi Central ah hian a lang Chiang viau dawn a ni a ti a, party pakhat leh chuan BJP do tur hrim hrimin a in Candidate tih a sawi a, Mizoram mipui tan a beidawn thlak hle a ni a ti.

Tun dinhmunah hian Candidate te thil tih tum leh an thusawi te ngaihtuah chuan BJP Mizoram MP Official Candidate chuan Union Minister a ni thei dawn tih a sawi a, BJP Candidate nilo, Party dang Candidate te thlan an nih chuan, Central ah thil dil tu anni dawn a, BJP Candidate erawh a diltu ni lovin, a petu zawk a ni dawn a ni," a ti.

BJP MP Official Candidate Pu Vanlalhmuaka, pawhin thusawiin, Congress Party awmna leh Sorkar apiangah buaina a awm ṭhin a ti a, India ram hmun tam takah pawh Congress chu an ral ta zel a, chutiang chiah chuan tun aṅanga hun reilo te ah Congress Party hi Mizoram ah pawh an ral tawh ngei dawn a, a dikna hmuh a ni zel ang a ti,

Pu Vanlalhmuaka chuan, Mizoramin dawt Politics a tuipei rei ta hle a ti a, hei vang hian State pawh hian a tuar nasa hle a, Development chhenfakawm

tak hmuh tur mumal a awm loh avangin retheihna in Mizoram a tuam a. Chuvangin Congress Party chu Sakhua ah an buai hle a, sakhuaana hmanga Vote zawng thin an ni a, Nimahsela an thusawite belhchian dawl a awm loh avang leh anmahni ah Sakhuaana in awmzia a awm chuan loh avangin tunah chuan an tuar phah ta a, India ram ah an ral mek a, Mizoram ah pawh MLA pakhat chiaah an neih phah ta ani a ti.



DGP PRESS CONF

Mizoram DGP Pu Anil Shukla chuan Lok Sabha inthlanpui vote thlak tuang taka neih anih theih nan Mizoram Police-te theihtawp chhuahin an inpuahchah a ti.

Nimina Aizawla thuthar thehdarhtute a kawmnaah Pu Anil Shukla chuan an hmalakna hrang hrang te a sawi a, Election Model Code of Conduct khauh taka kenkawh a nih thu leh Static Surveillance Team 81 leh Flying Squad team 83 an ruat thu a sawi a.

DGP chuan Mizoram chhungah Polling station 1280 a awm thu te, chung zinga 19 chu Critical Polling Station an nih bakah heng critical polling station-ah hian venhimna uluk lehzuala kalpui a nih thu a sawi a, Mizoram Police Radio Organisation lam chuan biak hlatna hmanrua an dah vek thu te, Expenditure Sensitive Polling Station 2 a awm thu leh, heng bakah hian Mizoram Police chuan Mizoram ramri depah Inter State Border Check Post hmun 12-a an siam thu te bakah Mizoram chhungah pawh Intra State Check post 40 an siam thu a sawi bawk.

Pu Anil Shukla chuan ruihhlo leh a kaihnawih man chungchangah Mizoram Police-te chuan an theihtawp an chhuah thu a sawi a, Kumin january ni 1 atanga vawiin thleng a ND&PS hnuaiyah case 106 ziah luh a nih thu te, hemi kaihnawih ah mi 134 an man thute bakah Heroin Kg 50.85 cheng Nuai 756 Sing 3, Sang 9 Za 662 man hu te , Ganja kg 15.95 cheng nuai 1 sing 3 sang3 za 750 man hu leh Methamphetamine kg 27.277 cheng nuai 354 sing 6 leh za man hu tun hnai a an man thu a sawi a. Mizoram Zu leh a kaihnawih pawh cheng vaibelchhe 2 nuai 89 sing 6 sang 6 leh za 210 man hu an man thu a sawi bawk.

Mizoram DGP chuan Ralthuam leh a kaihnawih avangin case 15 siam a nih thu leh hemi chungchangah mi 25 an man thu te, ralthuam 15 leh silai mu 3139 bakah Gelatine bomb box 203 an man thute a sawi bawk. Pu Anil Shukla chuan Mizoram state thenawm Assam, Tripura leh Manipur-a Mizoram hnaih SP leh OC te chu, Mizoram damri dep District SP leh OC ten vawi 20 chuang Lok Sabha inthlanpui tuang taka neih a nih theih nan an biak pawh tawh thu leh inthlanpui neih hma ni April ni 18-ah Assam, Tripura leh Manipur ramri te mipuite tana harsatna siam lova Mizoram kaltlang theih lova khar a nih tur thu a sawi.

VOTE JINGLE

Hei hi Akashvani Aizawl a ni.

Kan hma lawka Lok Sabha inthlana vote thlak turah hian khua leh tui, vote nei zawng zawngte mahni mawhphurhna a ni tih hriaa vote thlak vek turin kan insawm e.

